

MOSESE 'INA BUKI 'EBWEUNA 'ANA ESANA

NUGANA

1 i NUGANA Eaubada garewa ta gabura 'i mwerurudi. 2 Ta bare'u waboreborena ta kakaena; ta guguiio ni'u 'etaninaia 'i miami: ta 'Eaubada iaruiaruana ni'u 'etaninaia i 'ale'alededadana. 3 Ga Eauba da 'i ona, Maedana 'i da apwesa: ga maedana 'i apwesa. 4 Ta Eauba da maedana i 'itena, 'aene 'i bobo'ana: ga Eauba maedana 'i wearina guguiioega. 5 Ta Eauba maedana 'i eesena Asiata, ta guguiio 'i eesena Boiboi. Ta ni'atu 'asuiniuanua ta ni'atu gonagona, asiata 'ebweuna.

6 Ta Eauba da 'i ona, Bwagabwaga 'i da apwesa ni'u gamwagamwanaia, ta ni'u be ni'u 'i da wear. 7 Ta Eauba bwagabwaga 'i bubuna, ta ni'u bwagabwaga 'ubunaia ta ni'u bwagabwaga debanaia 'i wearidi: ta nadigega 'i apwesa. 8 Ta Eauba bwagabwaga nina 'i eesena Garewa. Ta ni'atu 'asuiniuanua ta ni'atu gona gona, ga asiata 'eruena.

9 Ta Eauba da 'i ona, Ni'u garewa 'ubuninaia si da egogona esena 'ebweuna 'ena, ta bwa'a iadaiadana 'i da apwesa: ta ni'atu nadigega.

10 Ta Eauba bwa'a iadaiadana i eesena Bare'u; ta ni'u 'idi egogona i eesena Ora: ta Eauba i 'itena 'i bobo'ana. 11 Ta Eauba da 'i ona, Bare'uiega nedu 'i da tabwama, pwatura maatuna, kaiwe uauana uana 'i da uaua adelina nadigega, maatuna, bare'uia: ta ni'atu nadigega. 12 Ta bare'uiega nedu 'i tabwama, pwatura maatuna adelina nadigega, ta kaiwe uauana, maatuna, adelina nadigega: ta Eauba i 'itena 'i bobo'ana. 13 Ta ni'atu 'asuiniuanua ta ni'atu gonagona, ga asiata 'etonina.

14 Ta Eauba da 'i ona, Maiare si da apwesa garewa bwagabwagana 'enai be 'enega asiata si da wear boiboi; ta si da 'ewe'ive'iaia manudi be, tuta manudi be, asiata ta iakwara manudi be: 15 Ta si da emaiare garewa bwagabwagana 'enai be bare'u si da tuemaedanina: ta ni'atu nadigega. 16 Ta Eauba maiare sinabwadi 'erua 'i bubudi; maiare me sinabwana asiata 'i da loine, ta maiare me gidarina boiboi 'i da loine: wate kwadima 'i bubudi. 17 Ta Eauba garewa bwagabwagana 'ena 'i sa'udi be 'enega bare'u si da tuemaedanina. 18 Ta asiata be boiboi si da loinedi, ta maedana si da wear guguiioega: ta Eauba i 'itena 'i bobo'ana. 19 Ta ni'atu 'asuiniuanua ta ni'atu gonagona, asiata 'eatanua.

20 Ta Eauba da 'i ona, Ni'uia iage mwerumweruruidi maiawasidi si eiaudidiga, ta manua si da taea bare'u 'etaninaia garewa bwagabwagana mata naia. 21 Ta Eauba rabarabao sinabwadi 'i mwerurudi, iage mwerumweruruidi maiawasidi iaiaudi si 'eetapewa ta, taudi ni'uia iaudidigadi, adelidi nadigega, manua mapapedi adelina nadigega ta: ta Eauba i 'itena 'i bobo'ana. 22 Ta Eauba da 'i ona obobomedi, 'i gwae, Wa da losiwa, ta wa da susaila, ta ni'u oraiwa wa da loemae, ta manua si da losiwa bare'uia. 23 Ta ni'atu 'asuiniuanua ta ni'atu gonagona, ga asiata 'enimana.

24 Ta Eauba da 'i ona, Bare'u 'enega iage mwerumweruruina maiawasina 'i da apwesama adelina nadigega, iobai, iage lökawarinata, bare'u bomitawana adelina nadigega ta: ta

ni'atu nadigega. 25 Ta Eaubada bare'u bomitawana adelina nadigega 'i bubuna, iobai adelidi nadigega ta, iage iauiaina bare'ua si elōkawara adelina nadigega ta: ta Eaubada i 'iten'a 'i bobo'ana. 26 Ta Eaubada 'i ona, Tai ta da bubuna 'ada ma'ana'a-iau 'atua, 'ada 'ita nadigega; ta si da loina ora ianina 'edia be, mwatui manuina 'edia be, iobai 'edia be, bare'u maibo'ana 'ena be, iage iauna si lōkawara bare'ua si kawakawara 'edia be. 27 Ta Eaubada tai 'i mweruruina 'ana ma'ana'a-iau tauna 'atua, Eaubada 'ana ma'ama'iau 'atua 'i mweruruina; me'olotona ta mewainena 'i mweruruidi. 28 Ta Eaubada 'i ona-obobomedi: ta Eaubada 'i eonedi, wa da losiwa, ta wa da susaila, ta bare'u wa da loemae, ta 'ena wa da ewaiwai; ta wa da loina ora ianina 'edia be, mwatui manuina 'edia be, iage iauna maiawasidi bare'ua si lōniu 'edia be. 29 Ta Eaubada 'i ona, Wa 'ita, pwatura iauna maatuna ia 'ebwaemi, taudi bare'u maibo'ana matanaia si miami, kaiwe iauna ta, kaiwe maatuna uana 'ena 'i miami; 'ami masura manuna, 30 Ta bare'u bomitawana iauna 'enaia, mwatui manuina iauna 'enaia ta, iage iauna si elōkawara bare'ua 'enaia ta, 'edia iawasidi 'i miami, ni'atu pwatura karakarawina iauna ia 'ebwaedi 'adi masura manuna: ta ni'atu nadigega. 31 Ta Eaubada iage 'ebweuna 'ebweuna ni'atu 'i bubuna i 'iten'a, ta, wa 'ita, tobobo'anasadi. Ta ni'atu 'asuinuanua ta ni'atu gonagona, asiata 'esikisina.

2 1 Ta garewa ta bare'u si gumwara, 2 ga 'adi iau maibo'ana. 2 Ta asiata 'esebenina Eaubada 'ina guinua ni'atu 'i bubuna 'i loegumwarina; ta asiata 'esebenina 'enega 'ina guinua iauna ni'atu 'i bubuna 'enega 'i eiawai'ata. 3 Ta Eaubada asiata 'esebenina 'i ona-obobomena, ta 'i tabuna: 'ena 'ina guinua iauna Eaubada 'i mweruruina ta 'i bubuna 'enega 'i eiawai'ata ta 'enega.

4 Getedi garewa ta bare'u 'idi 'ebetubua tutu 'enega si apwesa, asiata nina 'enega Ieoba Eaubada bare'u ta garewa 'i mweruruidi. 5 Ta tanoa 'ana kaiwe nigea 'ebweu bare'ua 'i miami, ta tanoa 'ana

pwatura nigea 'ebweu 'i tabwatabawa: Ieoba Eaubada nigea 'usana 'i giedau-nama bare'ua, ta nigea tai 'ebweu be bwa'a 'i da gesoi; 6 Ta bare'uegia gaguna 'i tu'ema, ta bwa'a matana maibo'ana 'i giepwasena. 7 Ta Ieoba Eaubada bwa'a nedilina 'enega tai 'i bubuna, ta 'ubusuna iawasina 'ena 'i sa'una; ta tai ni'atu iaruaria maia-wasina. 8 Ta Ieoba Eaubada bagura i 'asona Bomatu 'ena Ideni 'enai; ta tai nina ni'atu 'i bubuna 'ena 'i sa'una. 9 Ta Ieoba Eaubada kaiwe iauna 'adi 'ita bobo'adi, ta 'e'ai bobo'ana bwa'a 'enega 'i gietabwenama; wate iawasida 'ana kaiwe bagura gamwanaia, ta bobo'ana be to'umalina 'adi 'ebesinapu 'ana kaiwe. 10 Ta boasi 'ebweu Ideniega 'i apwesa be bagura 'i giepwasena; ta gote 'enega i 'etoweara ga narinao ata. 11 'Ebweuna 'ana esana Paison: tauna 'asa Abila maibo'ana 'i dausakowasienna, 'asa nina gola 'ena 'i miami; 12 Ta 'asa gote golina bobo'ana: 'ena de-lumi 'i miami ta gurewa berili. 13 Ta 'awa 'eruena 'ana esana Gaioni: tauna 'asa Kusa maibo'ana 'i dausakowasienna. 14 Ta 'awa 'etonia 'ana esana Idikeli: tauna Asiria matanaia 'i daudau. Ta 'awa 'eatana Euperetisi. 15 Ta Ieoba Eaubada tai i 'au'ewena, ta bagura Ideni 'ena 'i sa'una be 'i da gesoi ta 'i da 'ita' i'isina. 16 Ta Ieoba Eaubada tai 'i eonena, 'i gwae, Bagura kaiwena iauna 'enega 'u da 'e'ai besobeso: 17 Ta bobo'ana be to'umalina 'adi 'ebesinapu 'ana kaiwe 'enega, gea'abo 'enega 'u 'e'a: asiata nina 'enega u 'enina 'u da niwawasa 'ai'aila ta 'enega.

18 Ta Ieoba Eaubada 'i ona, Nigea bobo'ana tai 'i da miami tebweuna: 'ana 'arau ta 'ana tolema 'ebweu ia da bubuna. 19 Ta bwa'a 'enega Ieoba Eaubada bomitawa iauna 'i mweruruidi, mwatui manuidi iauna ta; ta tai 'ena 'i me'edi be 'i da 'ita' nai to'ase 'i da eesedi: ta to'ase nai tai iage mwerumweruruidi iauna 'i eesedi, tauna 'ana esana. 20 Ta tai iobai iauna 'i eesedi, mwatui manuina ta, bomitawa iauna ta; ta tai manuna nigea 'ebweu 'ana 'araumo tolema. 21 Ta Ieoba Eaubada 'eno'eno sinabwana 'enega tai 'i ununa, ga i 'eno-mwataia; ta asiana 'ebweuna :

'ewena, ta esionega 'i sa'u bodena 'ana lopa'eru ; 22 Ta asia nina, tauna Ieoba Eaubada tai 'enega i 'ewe'ewena, waine 'enega 'i bubuna, ta tai 'ena i 'au'ewenama. 23 Ta tai 'i ona, Gete tuga lulugu luluna, ta esiogu esiona : 'ana esana Waine, tai 'enega 'i apwesama ta 'enega. 24 'Enega tai tamana be sinana 'i da pilisinedi, ta mwanena 'ena 'i da miaiaina : ta siterua esio 'ebweuna. 25 Ta si bubugewa siterua, tai ta mwanena, ta nigea si omaiamai.

3 1 Ta moata nuuanusinasinapuna 2 ta bomitawa iauna Ieoba Eaubada i mweruruidi nigea nadigega. Ta waine 'ena 'i ona, 'Ai'aila, Eaubada ni'atu 'i gwae, Kaiwe iauna baguraia gea'abo 'enega wa da 'e'a ga ? 2 Ta waine moata 'ena 'i ona, Bagura 'ana kaiweiao uadiega 'a da 'e'ai : 3 Ta kaiwe bagura gamwanaia uana, Eaubada ni'atu 'i gwae, Gea'abo 'enega wa da 'e'ai, ta gea'abo wa gitoo, 'abona nai wa mwawamwawasa. 4 Ta moata waine 'ena 'i ona, Gea'abo sa'i wa mwawamwawasa : 5 Eaubada 'i mwawatoni ta 'enega 'aene asiata 'enega wa 'e'ani, ga matami si da 'esasa, ta wa e Eaubada 'atua, bobo'ana be to'umalina wa da sinapudi. 6 Ta ni'atu waine i 'itenia 'aene kaiwe nina 'e'ai bobo'ana, ta 'ana 'ita 'ebeguausoara, ta 'aene kaiwe nina 'ana 'ita 'ebesinapu, ga uana i 'ewena, ta i 'enina ; ta mwanena watema'ieana i 'ebwaena, ta i 'enina. 7 Ta siterua matadi 'esasedi, ta 'idi bubugewa si sinapuna ; ta damaiia iawana si sailina, ta 'adi gadiwana si bubuna. 8 Ta Ieoba Eaubada 'enana si nonona baguraia 'ilopilidadanu 'asuinuanuaia ; ta tai mamwanena si 'ekwaiiedi Ieoba Eaubada matanega bagura kaiwenao 'edia. 9 Ta Ieoba Eaubada tai 'ena 'i bwau, ta 'i eonema, Mane 'oio ? 10 Ta 'i gwae, 'Enaio ia nonona baguraia, ga ia matauta, mabubugewagu ta 'enega ; ga 'enega ia miakwai. 11 Ta 'i ona, Iaita 'i simanemu 'aene 'u bubugewa ? Kaiwe nina 'enega u 'e'ani ga, ga tauna manuna ia eonemu 'aene gea'abo u 'e'ani ? 12 Ta tai 'i gwae, Waine nina u 'ebwaegu be ma'ieagu 'a da miami, tauna kaiwe 'enega i 'ebwaegu, ga ia 'enina. 13 Ta Ieoba Eaubada waine 'ena 'i ona, To'ase gete 'u guinua ni'atu ? Ta

waine 'i gwae, Moata 'i kaboegu, ta 'enega ia 'enina. 14 Ta Ieoba Eaubada moata 'ena 'i ona, Iage gete 'u guiguinuena, ga 'enega 'oio 'u to'umali wawasae iobai iauiauna 'edia, bomitawa iauna 'edia ta ; gammamuiega 'u da tauria, ta nedila 'u da 'e'ani ga 'amu tuta iauiauna : 15 Ta 'oio ta waine wa da etarauwara, wate 'imu susu ta 'ina susu : tauna debao 'i da bwaruna, ta 'oio 'aedueduna 'u da bwaruna. 16 Waine 'ena 'i ona, 'Imu dedoi ta 'imu 'euwana ia da giesinabwa wawasae ; dedoi 'enega natumuao 'u da enatunedi ; 'imu nuuanua mwaneio 'ena 'i da miami, ta 'emuia 'i da loina. 17 Ta Adama 'ena 'i gwae, Mwaneio 'enana 'u nonona ta 'enega, ta kaiwe 'enega u 'enina, tauna manuna ia eonemu, ia gwae, Gea'abo 'enega 'u da 'e'a : bwa'a 'i to'umali manui ; ma'imu dedoi 'u da 'e'a iawasiio 'ana tuta maibo'anega ; 18 Kwakwakwara wate ta wewekai 'emuia 'i da gietabwa ; ta mitawa pwaturina 'enega 'u da 'e'ai ; 19 Maninio 'ina amweai 'enega masura 'u da 'e'ai, ga bwa'a 'ena 'u da ila ; 'enega 'u apwesama ta 'enega : 'oio nedila ta 'enega, ta nedila 'ena 'u da ila. 20 Ta tai mwanena i eesena Ibi ; tauna iauiaudi maiawasidi sinadi ta 'enega. 21 Ta Ieoba Eaubada Adama mamwanena manudi 'oama bwara 'i bubudi, ta 'i e'otedi.

22 Ta Ieoba 'i gwae, Wa 'ita, tai nina ni'atu 'abo'ada 'atua, bobo'ana ta to'umalina 'i sinapudi ; ta gete tuga, nai nimlana 'i da iasina, ta iawasina kaiwena wate 'i da 'ewa, ta 'i da 'e'ai, ta 'i da bobo'ana ataia : 23 'Enega Ieoba Eaubada bagura Ideni 'enega 'i etunena, be bwa'a 'enega 'i apwesama 'i da gesoi. 24 Ga tai 'i pa'ina ; ta bagura Ideni matana' bomatu 'ena Tierubima 'i sa'udi, ta sisaisa sabesabeluluna sena iauiauna 'edia, be iawasina kaiwena 'ana 'eda 'i da 'ita'ita'isi.

The Bible in the Dobu Language

Milne Bay Province
Papua New Guinea

© Bible Society of Papua New Guinea

42—1993—HKBS

ISBN 9980 63 289 5

First Published 1926

Reprint 1954

Regprint 1965

Reprint 1983 — 2,000

Reprint 1989 — 1,500

Reprint 1993 — 1,000